

**Ebazpena: R 174/2022**

**Espedientea: 51/2015 eta 10/2016, metatuak**

Vitoria-Gasteizen, 2022ko abenduaren 15ean.

Euskal Autonomia Erkidegoarekiko Ekonomia Itunean aurreikusitako Arbitraje Batzordeak –Violeta Ruiz Almendral batzordeburuak eta Soffía Arana Landín eta Javier Muguruza Arrese batzordekideek osatuak– erabaki hau hartu du:

## **ERABAKIA**

Zerga Administrazioiko Estatu Agentziak (aurrerantzean ZAEA) Gipuzkoako Foru Aldundiarekiko (aurrerantzean GFA) aurkeztu duen gatazkari buruzkoa. Erabakiaren helburua da zehaztea nork duen eskumena TESLk eta TTUSLk langile jakin batzuen 2010. urteko laneko irabaziengatik egindako atxikipenak ordainarazteko. Gatazka hori Arbitraje Batzorde honetan izapidetu da, hurrenez hurren 51/2015 eta 10/2016 espediente-zenbakiekin.

## **I. AURREKARIAK**

1.- TESL zerga-egoitza Gipuzkoan duen erakunde bat da, eraikuntzarako makinak eta ekipoak alokatzen dituen eta zerbitzuak lurralde nazional osoan eta atzerrian ematen dituen, lantoki bakarra eta Gipuzkoan kokatua eduki arren.

Enpresaren jarduera nagusia pieza handiak muntatzea da, eta horretarako erabiltzen ditu, batez ere, edukiera handiko garabi mugikor autopropulsiatuak, kamioi-garabiak eta lanak egiteko ezinbestekoak diren laguntza-elementuak.

**2.-** 2015eko martxoaren 24an, ZAEAk txosten bat egin zuen. Bertan ondorioztatzen denez, atxikitzaileak GFari gaizki ordaindu dizkio zerbitzuak lurralde erkidean bakarrik, atzerrian bakarrik edo lurralde erkidean eta atzerrian eman dituzten zenbait langileren 2010eko atxikipenak. Gatazka aurkezteko idazkiarekin batera aurkeztutako I. eranskinean dator aipatutako langileen zerrenda.

**3.-** 2015eko maiatzaren 13an, aipatutako txostena jakinarazi zion ZAEAk GFari, eta bidegabe sartutako atxikipenak bidaltzeko eskatu zion.

2015eko uztailaren 16an, GFAk uko egin zion atxikipenak bidaltzeari, ZAEAREN aldeko administrazioarteko eskubide publikoa preskribatuta zegoela iritzita.

**4.-** 2015eko irailaren 11n, aipatutako atxikipenen gaineko eskumena baliatzeari uzteko eskatu zion ZAEAk GFari. 2015eko urriaren 26an, GFAk espresuki berretsi zuen bere eskumena.

**5.-** 2015eko azaroaren 4an, 51/2015 espediente-zenbakiarekin izapidetzen ari den eskumen-gatazka aurkeztu zuen ZAEAk Arbitraje Batzordean.

**6.-** TTUSL zerga-egoitza Gipuzkoan duen erakunde bat da, salgaiak errepidez garraiatzen dituena eta zerbitzuak lurralde nazional osoan eta atzerrian ematen dituena, lantoki bakarra eta Gipuzkoan kokatua eduki arren.

Enpresaren jarduera-adar nagusiak honako hauek dira: garraio berezia, parke eolikoetarako materialaren garraioa, elementu aurrefabrikatuen garraioa, elementu modular autopropulsatuen bidezko garraioa eta garraio konbentzionala.

**7.-** 2015eko martxoaren 24an, ZAEAk txosten bat egin zuen. Bertan ondorioztatzen denez, atxikitzailleak GFari gaizki ordaindu dizkio zerbitzuak lurralde erkidean bakarrik, atzerrian bakarrik edo lurralde erkidean eta atzerrian eman dituzten zenbait langileren 2010eko atxikipenak. Gatazka aurkezteko idazkiarekin batera aurkeztutako I. eranskinean dator aipatutako langileen zerrenda.

**8.-** 2015eko irailaren 30ean, aipatutako txostena bidali zion ZAEAk GFari, eta bertan adierazitako atxikipenak bidaltzeko eskatu zion.

2015eko abenduaren 11n, GFAk uko egin zion atxikipenak bidaltzeari, ZAEAREN aldeko administrazioarteko kreditu publikoa preskribatuta zegoela iritzita.

**9.-** 2015eko urtarrilaren 26an, aipatutako atxikipenen gaineko eskumena baliatzeari uzteko eskatu zion ZAEAk GFari.

2016ko martxoaren 3an, eskumena baliatzeari uzteko errekerimenduari erantzun zion GFAk, ZAEAREN aldeko kreditu-eskubidea preskribatu zela eta eskumena baliatzeari uzteko errekerimendua epez kanpoko zela alegatuz.

**10.-** 2016ko martxoaren 23an, ZAEAk eskumen-gatazka aurkeztu zuen, eta gatazka hori 10/2016 espediente-zenbakiarekin izapidetu da.

**11.-** 2021eko azaroaren 26an, bi prozedurak metatzea erabaki zuen Arbitraje Batzordeak. Prozedura arruntaren arabera izapidetu ziren, eta hilabeteko epean hasierako alegazioak eta azken alegazioak egiteko izapideak eskaini ziren, hurrenez hurren.

## II. ZUZENBIDEKO OINARRIAK

### 1.- Arbitraje Batzordearen eskumena

Arbitraje Batzordeak eskumena dauka lan pertsonalagatik egindako atxikipenak ordainarazteko eskumena zeinek duen ebazteko, Ekonomia Itunaren 66. Bat artikuluan xedatutakoaren arabera eskumen hauek baititu batzordeak:

*a) Estatuko Administrazioaren eta foru-aldundien artean edo foru-aldundien eta beste autonomia-erkidegoetako administrazioen artean sortzen diren gatazkak ebaztea, bai tributu itunduen lotuneen aplikazioari dagokionez, bai administrazio bakoitzari zenbateko zatia dagokion zehazteko, sozietateen gaineko zergaren edota balio erantsiaren gaineko zergaren baterako tributazioaren kasuetan.*

*b) Banakako tributu-harremanetako arazo zehatzetan ekonomia-itun hau interpretatzeko eta aplikatzeko orduan administrazio interesdunen artean sor litezkeen gatazkak erabakitzea.*

*c) Zergadunen egoitza dela-eta sor litezkeen desadostasunak ebaztea.*

### 2.- Prozedurak metatzea

Administrazio Publikoen Administrazio Prozedura Erkidearen urriaren 1eko 39/2015 Legearen 57. artikulua honako hau xedatzen du:

*Prozedura hasten edo izapidetzen duen administrazio-organoak, prozedura hasteko modua edozein dela ere, erabaki dezake, ofizioz edo alderdi batek eskaturik, prozedura hori metatzea oinarri bera edo lotura*

*estua duten beste batzuekin, organo berak izapidetu eta ebatzi behar badu prozedura.*

*Metatzeko erabakiaren aurka ezin da errekurtsorik aurkeztu.*

Kasu honetan, antzeko bi erakundek egoera berean dauden hainbat langileri (lurralde erkidean eta/edo atzerrian zerbitzuak eman dituzten langileak dira) urte berean egindako lan pertsonalagatiko atxikipenak ordainarazteko eskumena norena den eztabaidatzen da.

### 3.- Aplikatu beharreko arauak

Lan pertsonalaren atxikipenak ordainarazteko eskumena lurraldearen arabera eskumena duen foru-aldundiari dagokio, 7. artikulua jatorrizko testuko – *ratione temporis* aplikagarria baita– irizpide hauen arabera:

*a) Euskadin egindako lan edo zerbitzuetatik datozen etekinak.*

*Lanak edota zerbitzuak lurralde erkidean eta Euskadiko lurraldean egiten direnean, arauak edo zerbitzuak Euskadin egiten direla uste izango da, aurkako frogarik ezean, baldin eta langilearen lantokia lurralde horretan badago.*

4.- Zuzenbide publikoko kredituen preskripzioari buruzko doktrinaren eta jurisprudentziaren azterketa

#### 4.1.- Arbitraje Batzordearen 11/2014 Ebazpena

Eztabaidagai den gaia honela laburbil daiteke:

Zerga-egoitza Gipuzkoan duen XXX enpresak BEZaren % 100 ordaindu zion GFARI 1998an, eta emaitza itzultzekoa izan zen.

Enpresa horrek 2002ko abenduaren 27an idazki bana aurkeztu zion GFARI eta ZAEARI, 1998an bere eragiketa-bolumenaren % 76,68 GFARENA eta % 23,32 ZAEARENA izan zela adierazten zutenak, eta ZAEAK alde GFARI transferitzeko eskatu zuen.

ZAEAK 2003ko abenduaren 10ean onartu zuen zergapekoak adierazitako proportzioa, eta 2004ko maiatzaren 20an 1998ko abenduari zegokion zenbatekoa transferitzea erabaki zuen, aurrekoa (98ko urtarrila-azaroa) preskribatuta zegoela iritzita.

2008ko martxoaren 13an, eskumena baliatzeari uzteko errekerimendua egin zion GFAK ZAEARI.

Azkenean, gatazka aurkeztu zen.

GFAREN ustez, 1998ko BEZAGATIK enpresari egindako itzulketa 2002ko abenduaren 27an bidegabe bihurtu zen, zergapekoak idazkia bidali zuenean; beraz, une horretan hasi zen preskripzioa zenbatzen, eta eten egin zen ZAEAREN 2012ko abenduaren 10eko eta 2004ko maiatzaren 20ko egintzen ondorioz.

Arbitraje Batzordearen jarrera:

GFAK ZAEAREKIKO duen kredituaren preskripzio-epea Aurrekontu Orokorrei buruzko azaroaren 26ko 47/2003 Legeak (aurrerantzean ALO) arautzen du (1998an 5 urtekoa zen, baina gerora 4 urtera murriztu zen).

GFAk zergapekoa ikuskatzeko eskumena zuen, eta edozein unetan erabil zezakeen eskumen hori. Hala ere, zergapekoaren 2002ko abenduaren 27ko idazkiak ez du sortzen bidegabe egindako itzulketa baten ordaina jasotzeko eskubidea. Beraz, eskubidea erabiltzea preskribatuta dago.

GFAk ZAEARI egotzi nahi dizkio bere eskumenak ez erabiltzearen ondorioak.

GFAk 4 urteko epea izan zuen itzulketa egiaztatzeko, eta, zati bat bidegabetzat jo izan balu, 5 urteko epea zuen (gero 4 urtera murriztua ALOn) bidalketa ZAEARI erreklamatzeko.

Era berean, ez da preskripziorako oztopoa ZAEAK zergapekoaren 2002ko abenduaren 27ko idazkia zergapekoarekin bakarrik egiaztatzea, eta ez GFAREKIN, GFAk zergapekoari likidatzeko duen eskubidea ere ez litzatekeelako preskribatuko.

**4.2.-** Auzitegi Gorenaren 2015eko abenduaren 15eko Epaia (ECLI:ES:TS:2015:5337).

Errekurtsoa Arbitraje Batzordearen 11/2014 Ebazpenaren aurka jarri zen, eta, beraz, eztabaida aurrez aztertutako berbera da.

Auzitegi Gorenaren jarrera:

Arbitraje Batzordeak preskribatutzat jotzen du GFAk ZAEARI balizko kreditua erreklamatzeko eskubidea (zergapekoari egin zizkion baina ZAEARI zegozkion itzulketen ondoriozko kreditua, hain zuzen ere).

Preskripzio hori ez zen 2004ko maiatzaren 20an eten, *preskripzio-institutuaren izaeraren beraren aurka doalako zordunak (Zerga*

*Administrazioko Estatu Agentzia), hirugarren bati zuzendutako egintza baten bidez, epea hartzekodunaren (Foru Aldundia) mesedetan eten ahalizatea, egintza horrek ez baitio zuzenean eragiten haren eskubideari.*

#### **4.3.- Auzitegi Gorenaren 2022ko otsailaren 10eko Epaia (ECLI:ES:TS:2022:596)**

Eztabaidagai den egoera:

Bizilekua Nafarroan duen zergapeko batek PFEZaren 2010eko aitortpena aurkeztu zuen 2011ko ekainean Nafarroako Zerga Ogasunean (aurrerantzean NLO).

2012ko abenduaren 5ean, aitortpen osagarri bat aurkeztu zuen, eta zegokion dirua sartu zuen.

2016ko ekainaren 14an, egoitza 2009ra arteko atzeraeraginarekin aldatzeko proposamena egin zion ZAEAk NLOri.

NLOk 2019ko otsailaren 25ean proposamena onartzen zuela erantzun zuen, baina ondorioak preskribatu gabeko 2016ko ekainaren 14ra arteko ekitaldietara atzeratu zituen, eta, beraz, ez zuen 2010eko PFEZa transferitu, 2015eko ekainean preskribatu zela uste baitzuen, aitortpen osagarriak ez zuelako preskripzioa eten.

Hitzarmen Ekonomikoko Arbitraje Batzordearen jarrera:

NLOren eta zergapekoaren artean ezartzen den harreman juridiko tributariora eta ZAEAREN eta NLOren artean ezartzen den harreman juridiko publikoa baina ez-tributariora desberdinak dira. Harreman horren arabera,



ZAEA NLOren hartzekoduna da, zergapekoak bidegabe ordaindutako kopuruagatik.

Administrazioaren eta zergapekoaren jarduketek zerga-kredituaren preskripzioa eten arren, ez dute etengo zergaz kanpoko kredituaren preskripzioa. Horrela, autolikidazio osagarriak ez du etengo administrazioen arteko kredituaren preskripzioa (2011n 2010eko PFEZagatik sartutako kopuruari dagokiona); baina epez kanpo sartutako kopurua bakarrik kontuan hartuz gero, administrazioarteko kreditua ez da preskribatzen hasiko dirua sartu arte, *zuzenbide zibilean agertzen den arrazoirik gabeko aberastearen antzeko egoera delako; horrek pertsona bat justifikaziorik gabe aberastea dakar, eta ondorioz, beste baten pobretzea.*

Beraz, Hitzarmen Ekonomikoko Arbitraje Batzordearen iritziz, arazoa konpontzeko bi proposamen hartu behar dira kontuan:

- Zergapekoak eskumenik ez duen administrazioan aurkeztutako autolikidazio osagarriak ez du eteten eskumena zuenak azken horrekiko duen kredituaren preskripzioa. Hori argi dago berez, hirugarrenen arteko egintza bat delako, eta harreman juridiko-tributario baten esparruan gertatzen delako, zeina erabat desberdina baita gatazkan dauden administrazioak lotzen dituen zuzenbide publikoko zergaz kanpoko kredituarekin alderatuta.

- Administrazio eskudunak eskumenik gabeko administrazioarekiko duen kreditua bidegabeko kobrantza egin zen unean sortu zen (zergapekoak eskumenik gabeko administrazioari ordaindu zion administrazio horri ez zegokion zenbateko bat) . Hori ere agerikoa da, bidegabe kobratu baino minutu bat lehenago, administrazio

eskudunak ez zuelako inolako krediturik ezer kobratu ez zuenarekiko.

Auzitegi Gorenaren jarrera:

Zergaz kanpoko administrazioarteko kreditu publikoari dagokionez, horrelako kasuetan dagoena ez da kreditu-eskubide bat, bi baizik: administratuak lehen aldi bidegabe ordaindutakoa kobratzeko eskubidea eta bigarren aldiz oker ordaindutakoa kobratzeko eskubidea.

Beraz, egoitza-aldaketa proposatzen den egunean, preskribatuta dago 2011ko ekainean sartutako zenbatekoa bidaltzeko kreditua, baina ez 2012ko abenduan sartutakoa.

**4.4.-** Auzitegi Gorenaren 2020ko abenduaren 3ko Epaia.  
ECLI:ES:TS:2020:4077

Eztabaidagai den egoera:

Senar-emazte batzuek 2009ko eta 2010eko PFEZaren baterako aitortpena aurkeztu zuten NLOn, eta emaitza itzultzekoa izan zen.

2013ko apirilaren 22an, aitortpen osagarriak aurkeztu zituzten: ordaintzekoak.

2016ko ekainaren 17an, zergapekoen egoitza 2009ko urtarrilaren 1era arteko atzeraeraginekin aldatzeko eskatu zion ZAEAk NLOri.

2017ko apirilaren 4an, NLOk baietz erantzun zuen, baina administrazioen arteko ondorioak 2012ko ekainaren 17ra arte baino ez zituen atzeratu. Beraz, ez zituen jaso ZAEAk 2009 eta 2010eko PFEZari dagokionez

bidegabe egindako itzulketengatiko zenbatekoak, ez eta zergapekoek ordaindutako 2012ko lehen hiruhilekoko ordainketa zatikatuak ere. Senar-emazteek 2013ko apirilaren 22an bidegabe ordaindutako zenbatekoak bai, jaso zituen.

Hitzarmen Ekonomikoko Arbitraje Batzordearen jarrera:

Kontua da ikustea ea aitorten osagarriak eten egiten duen ZAEAk NLOrekiko duen zergaz kanpoko kreditu-eskubidearen preskripzioa.

Epez kanpoko aitortena aurkezteagatik zergapekoaren aurrean zerga-eskubidea preskribatzeak ez du eraginik administrazioen arteko tributuez besteko kredituen preskripzioan, argi baitago hirugarren pertsonen (zergapekoak, kasu honetan) egintzek ezin dutela eraginik izan administrazioen arteko kredituaren preskripzioan.

Kreditu-eskubidea eta administrazioen arteko betebeharra zergaren gaineko eskumenaren titulartasunetik soilik sortzen dela dioen premisatik abiatzen badira ere administrazioak, argi dago ez dela horrela. Zalantzarik gabe, administrazio bat bestearen hartzekodun izan dadin, ezinbestekoa da lehenak zerga ordainarazteko eskumena izatea, baina kreditua ez da hortik sortzen, eskumenik ez duen administrazioan dirua sartzetik baizik.

Beraz, bidezkoa da aitortzea ZAEAk eskubidea duela zergapekoak 2013ko apirilaren 22an bidegabe ordaindutako zenbatekoak jasotzeko, baina ez 2009ko eta 2010eko aitortpenen ondorioz bidegabe itzuli zitzaizkion zenbatekoak jasotzeko.

2012ko lehen hiruhilekoko ordainketa zatikatuei dagokienez, betebehar nagusiarekiko autonomoak direla onartuta ere, eta onartu arren dirua

bidegabe sartzen denean sortzen dela dirua bidaltzeko zergaz kanpoko eskubidea, Hitzarmen Ekonomikoko Arbitraje Batzordearen ustez, zerga (2012ko PFEZa) ordaintzen den unean itzulketa-betebeharraren berritze antzeko bat gertatzen da, aurretik egindako konturako ordainketa PFEZaren kuota kuantifikatzeko elementu bihurtzen baita. Une horretan, konturako ordainketa itzultzeko eskubidea erabat edo partzialki azkenduko da, eta itzulketa-eskubide berri bat sortuko da. Eskubide horren xedea ez da nahitaez zergaren kuota diferentziala, kuota likidoa baizik, edo, zehatzago esanda, eskumenik ez duen administrazioak kontura jasotako zenbatekoak kendu aurreko kuota diferentziala. Horregatik, ZAEArri dagokio bidaltzea.

Hori guztia konturako ordainketei aplika dakieke oro har; hau da, atxikipenei, konturako sarrerei eta ordainketa zatikatuei, baina gaineratu behar da nabariagoa dela ordainketa zatikatuen kasua, pertsona bera delako horiek egitera eta zerga ordaintzera behartuta dagoena. Zentzugabea eta bidegabea litzateke garaiz ordaindu ez zen ordainketa zatikatua ordaintzeko eskatzea zerga ordaindu duen pertsona berari, ordainketa zatikatua kendu gabe. Pertsona berak kopuru bera bi aldiz ordainduko luke, eta, hala balitz, nahitaez ulertu beharko litzateke ordainketa zatikatua ordaintzeko betebeharrak ez lukeela funtsik, eta ordainketa zatikatua ez kentzeagatik soberan ordaindutako zergaren itzulketari zergadunaren kreditu bat aldi berean sortuko lukeen diru-sartzetat baino ezingo litzateke hartu.

Auzitegi Gorenaren jarrera.

Ordainketa zatikatuari dagokionez, uste du betebeharraren autonomia dela eta, beraz, preskribatuta dagoela. Hala, hauxe adierazi du: *2012ko lehen hiruhilekoko konturako ordainketa zatikatuei dagokienez ondorio bera*

*atera zen; izan ere, haien autonomiak, TLOren 23.1 artikularen arabera, betebeharraren izaera ematen die, eta preskripzio-epeak ez dira zerga-egitaterik eratorritako betebeharrarenak.*

#### 4.5.- Auzitegi Gorenaren 2021eko urtarrilaren 28ko Epaia. ECLI:ES:TS:2021:372

Eztabaidagai den egoera:

Senar-emazte batzuek aitortzea aurkeztu zuten NLOn: 2009an saldutako akzioengatik konturako ordainketak sartu zituzten 2010eko apirilaren 20an, eta 2009ko PFEZaren aitortzea aurkeztu zuten 2010eko ekainaren 30ean.

2014ko ekainaren 17an, egoitza 2009ko urtarrilaren 1etik aurrerako ondorioekin aldatzeko eskatu zion ZAEAK NLOri.

NLOk egoitza aldatzea onartu zuen, baina administrazioen arteko kredituari dagokionez, konturako ordainketa, betebeharraren autonomo edo nagusi gisa, preskribatuta zegoela ulertu zuen.

Datu horietatik abiatuta, irtenbidea sinplea da; bi modutara uler dezakegu: batetik –konturako sarrerak egiteko zerga-betebeharraren erabateko autonomia eta preskripzioa eteteko hirugarrenen egintzek duten garrantzirik eza kontuan hartuta–, 2014ko ekainaren 17an, lau urte igaro zirenez, ZAEAK NLOri bidegabeko ordainketen *bidalketa* erreklamatzeko duen eskubidea preskribatu egingo zen; edo bestetik, –konturako ordainketa horien eta zergaren autolikidazioaren eta ordainketaren arteko lotura kontuan hartuta–, zergadunaren *bitarteko* egintza horrek preskripzioa eteteko ondorioak izango zituen.

Auzitegi Gorenaren jarrera:

Administrazioen arteko harremanetan, hizpide dugun kasuan bezala, zuzenbide publikoko zergaz kanpoko kredituak daude jokoan, eta horiek lau urteko preskripzio-epea dute, ezinbestean, ALOko 25. artikulua araberan.

Epe hori ezin da eten bi administrazioen arteko zuzenbide publikoko harremanetik kanpoko hirugarren baten egintzaren ondorioz.

Ez gatoz bat Hitzarmen Ekonomikoko Arbitraje Batzordeak defendatzen duen kredituaren *berritzearen* teoriarekin; aitzitik, konturako ordainketa autonomoa dela eta preskripzio-epe propioa duela uste dugu, honako arrazoi hauengatik:

- Konturako ordainketak egiteko zerga-betebeharrak *izaera autonomoa du zerga-betebehar nagusiarekiko* (Zergei buruzko abenduaren 17ko 58/2003 Lege Orokorraren 23.1 artikulua), harekin batera zerga-zorra ere barne hartzen du (lege-testu beraren 58.1 artikulua), eta ez du ezerk baimena ematen *–prima facie* eta lege-baieztapen hura kontuan hartuta– betebehar horren preskripzioari buruzko salbuespenezko araubide bat ezartzeko, orokorrarekiko desberdina, bai epeei dagokienez, bai horiek eteteko egintzei dagokienez.

Autonomia horren ondorioz, dagokion konturako ordainketa egin ondoren, preskripzio-epea hasiko da, bai *–nahi gabe–* konturako ordainketa bidegabea egin zuen zergadunarentzat, bai konturako ordainketa egin behar zitzaion administrazioarentzat, dirua bidegabe sartu zitzaion beste administrazioa jo dezan; izan ere,

azken kasu horretan –jurisprudentziak behin eta berriz ezarritakoaren arabera–, administrazio publikoen arteko zuzenbide publikoko kreditua denez, ezin da preskripzioa eten hirugarrenen egintzen bidez, ezta ukitutako zergadunaren egintzen bidez ere.

- Hain zuzen ere, tributua zatika ordaintzeko eta sartzeko betebeharrak –nahiz eta lotuta egon– independenteak direlako, ordenamendu juridikoak bi horiek aitortzeko eta ordaintzeko epe desberdinak, ez-betetzeetarako arau-hauste eta zehapen mota desberdinak eta interesen ordainketa aitortzeko araubide desberdinak ezartzen ditu.

- Auzi honetan aztertzen ari garen betebeharren arteko autonomia are nabariagoa egiten duen faktore bat dago: dagokion zergaren kuotatik legez ken daitezke konturako ordainketak, atxikitzeko edo kontura sartzeko betebeharra duen zergapekoak ordaindu ez dituenak.

Berritzearen tesiak esan nahi du, autolikidazioaren bidez, konturako ordainketa zergaren ordainketa *bihurtzen* dela (betebeharraren sortze-data aldatuta); eta hori originala da, bai, baina ez dator bat jokoan dauden zerga-betebeharren legezko konfigurazioarekin eta, batez ere, gauzen izaerarekin: konturako ordainketa une jakin batean egin zen eskumenik gabeko administrazio batean (NFO), eta legeak zehazten duena da –ñabardurarik gabe– administrazio eskudunak (ZAEA) bidegabe ordaindutako zenbatekoa itzultzeko eskubidea egikaritu dezakeela arauan aurreikusitako preskripzio-epean (lau urte), eta epe hori ez dela etengo –jurisprudentziak behin eta berriz ezarritakoaren arabera– hirugarren baten egintza batengatik (adibidez, zergadunaren egintza batengatik),

hirugarren hori administrazio publikoen arteko harremanetik kanpokotzat jo behar baita.

#### **4.6.- Auzitegi Gorenaren 2020ko maiatzaren 18ko Epaia. ECLI:ES:TS:2020:1010**

Eztabaidagai den egoera:

Zergapekoak 2011ko ekainaren 14an aurkeztu zuen 2010eko PFEZaren autolikidazioa NLOn. 2012ko abenduaren 28an, autolikidazio osagarria aurkeztu zuen.

2015eko urriaren 2an, zergapekoaren egoitza 2010eko urtarrilaren 1era arteko atzeraeraginekin aldatzea proposatu zion ZAEAk NLOri.

2015eko azaroaren 17an, administrazioen artean 2011ko urriaren 2rako atzeraeragina duen aldaketa onartu zuen NLOk eta, aldaketa horretan, 2012ko abenduaren 28an egindako diru-sarrera osagarria gehitu zen, baina ez 2011ko ekainaren 14an sartutako 2010eko aitorpena.

Auzitegi Gorenaren jarrera:

Izaera publiko eta zergaz kanpoko duen kreditu-eskubide bat da, 4 urteko preskripzio-epea duena (ALOn ezarritakoa), eta ez da etengo bi administrazioen arteko zuzenbide publikoko harremanetik kanpo zergapekoak gauzatutako egintzen ondorioz.

Aitorpen osagarriak ez du aipatutako kredituaren preskripzioa eteten; izan ere, zergaz kanpoko kreditua dela kontuan hartuta, ez litzateke logikoa izango preskripzio hori hartzekodunaren (ZAEA) mesedetan eten ahal izatea, hirugarren batek (Alejandro jaunak) zordunarekin (NZO) izandako



jarduketagatik, zordunak hartzekodunarekin duen zorra aitortzea dakarten egintzek bakarrik eteten baitute preskripzioa.

## 5.- Arbitraje Batzordearen jarrera

Jurisprudentzia baketsua eta behin eta berriz ezarritakoa da administrazioarteko eskubidea izaera publikoko aurrekontu-eskubidea dela, administrazioak zergapekoaren aurrean (kasu honetan atxikitzailea) duen zerga-eskubidea ez bezalakoa.

Administrazioarteko eskubidearen preskripzio-epea dirua bidegabe sartzen den unean hasten da, eta ez da etengo bere burua zergapekoaren (hirugarren pertsona bat administrazioarteko harreman juridikoan) eskuduntzat jotzen duen administrazioak jarraitzen duen zerga-prozeduran egiten diren egintzengatik.

Horrela, bada, kontuan hartuta bai TESLk eta bai TTUSLk legez eskatutako datetan egin zituztela beren diru-sarrerak, eta konturako azken ordainketa 2011ko urtarrilaren 25ekoa dela ikusita, preskribatuta dago ZAEAk GFaren aurrean duen administrazioarteko kreditu publikorako eskubidea 2010eko atxikipenei dagokienez.

Horiek horrela, Arbitraje Batzordeak hauxe

**ERABAKITZEN DU**

1.- Preskribatutzat jotzea ZAEAk GFaren aurrean duen administrazioarteko eskubide publikoa, zergapekoek-atxikitzaileek 2010eko lan-etekinengatik GFari ordaindutako atxikipenei dagokienez.

2.- Erabaki hau Zerga Administrazioko Estatu Agentziari, Gipuzkoako Foru Aldundiari eta TESL eta TTUSLri jakinaraztea.